

現代生活藝術系列

華嚴經疏論纂要 94

— 離世間品之五 —

華藏淨宗學會印贈

大方廣佛華嚴經疏論纂要卷第九十四

五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

離世間品第三十八之五

佛子。菩薩摩訶薩有十種習氣。何等爲十。所謂菩提心習氣。善根習氣。教化衆生習氣。見佛習氣。於清淨世界受生習氣。行習氣。願習氣。波羅蜜習氣。思惟平等法習氣。種種境界差別習氣。是爲十。若諸菩薩安住此法。則永離一切煩惱習氣。得如來大智習氣。非

習氣智

疏第三十種習氣下五門。明三地中行。分二。前二門。明能起厭行。後三門。卽所起厭行。前中。此門明熏習成氣。後門。增盛攝取。今初。由此地厭伏煩惱。故於諸行積習。熏成氣分。方能究竟斷伏煩惱。故名習氣。十中。一行本氣。二成行氣。三下化。四上見。五受生。六大行。七十願。八十度。九理智。十量智。

佛子。菩薩摩訶薩有十種取。以此不斷諸菩薩行。何等爲十。所謂取一切衆生界究竟教化。故取一切世界。究竟嚴淨。故取如來修菩薩行。爲供養。故取善根。

積集諸佛相好功德故取大悲滅一切衆生苦故取
大慈與一切衆生一切智樂故取波羅蜜積集菩薩
諸莊嚴故取善巧方便於一切處皆示現故取菩提
得無礙智故略說菩薩取一切法於一切處悉以明
智而現了故是爲十。若諸菩薩安住此取則能不斷
諸菩薩行得一切如來無上無所取法

疏二十種取者。明增盛攝取。故晉經名熾然。由前
積習愛樂得增上故

佛子。菩薩摩訶薩有十種修。何等爲十。所謂修諸波
羅蜜。修學。修慧。修義。修法。修出離。修示現。修勤行匪

懈。修成等正覺。修轉正法輪。是爲十。若諸菩薩安住其中。則得無上修。修一切法。

〔疏〕第二十種修。下三門。明所起厭行。卽分爲三。此門正顯修行。前八修因。後二修果。

佛子。菩薩摩訶薩。有十種成就佛法。何等爲十。所謂不離善知識。成就佛法。深信佛語。成就佛法。不謗正法。成就佛法。以無量無盡善根。迴向成就佛法。信解如來境界。無邊際。成就佛法。知一切世界境界。成就佛法。不捨法界。境界成就佛法。遠離諸魔境界。成就佛法。正念一切諸佛境界。成就佛法。樂求如來十力。

境界成就佛法。是爲十。若諸菩薩安住此法。則得成就如來無上大智慧。

〔疏〕第二成就佛法。明修成勝緣。依託此十能成就故。

佛子。菩薩摩訶薩有十種退失佛法。應當遠離。何等爲十。所謂輕慢善知識。退失佛法。畏生死苦。退失佛法。厭修菩薩行。退失佛法。不樂住世間。退失佛法。耽著三昧。退失佛法。執取善根。退失佛法。誹謗正法。退失佛法。斷菩薩行。退失佛法。樂二乘道。退失佛法。嫌恨諸菩薩。退失佛法。是爲十。若諸菩薩遠離此法。則

入菩薩離生道

〔疏〕第三十種退失。明修行離過。別舉十過。總令遠離。文並可知。已上五門明三地中行竟。

佛子。菩薩摩訶薩有十種離生道。何等爲十。所謂出生般若波羅蜜而恒觀察一切衆生。是爲一。遠離諸見而度脫一切見縛衆生。是爲二。不念一切相而不捨一切著相衆生。是爲三。超過三界而常在一切世界。是爲四。永離煩惱而與一切衆生共居。是爲五。得離欲法而常以大悲哀愍一切著欲衆生。是爲六。常樂寂靜而恒示現一切眷屬。是爲七。離世間生而死。

此生彼起菩薩行。是爲八。不染一切世間法而不斷一切世間所作。是爲九。諸佛菩提已現其前。而不捨菩薩一切願行。是爲十。佛子。是爲菩薩摩訶薩十種離生道。出離世間不與世共。而亦不雜二乘之行。若諸菩薩安住此法。則得菩薩決定法。

〔疏〕第四離生道下五門。明四地中行。分三。初此門。明清淨對治修行增長因。次門明其清淨。後三門。明對治修行增長。鈔初門明等。彼有四分。今具其門。一一皆與彼本分相。二但畧無果。果非正地。故然。諸應有不曉者。尋前自了。今初三地。寄同世間。有見等惑。猶如生食在腹。四地寄同出世。對治清淨。

能離彼生。謂離有爲行故。得無生故。顯行純熟。離生澀故。廣如婆沙。今是彼清淨對治之因。故名爲道。地經有十法明門。初是觀察衆生。今但廣斯一句。餘畧不具。結云不雜二乘者。以於十句雙行而修。故不同二乘。見道離生矣。

佛子。菩薩摩訶薩有十種決定法。何等爲十。所謂決定於如來種族中生。決定於諸佛境界中住。決定了知菩薩所作事。決定安住諸波羅蜜。決定得預如來衆會。決定能顯如來種性。決定安住如來力。決定深入佛菩提。決定與一切如來同一身。決定與一切如

來所住無有二。是爲十

〔疏〕第二決定法者。明其清淨。上明能離。今顯所得。以得出世決定法故。故彼文云。得彼內法。生如來家。十中前五自分。後五勝進。

佛子。菩薩摩訶薩有十種出生佛法道。何等爲十。所謂隨順善友。是出生佛法道。同種善根故。深信解。是出生佛法道。知佛自在故。發大誓願。是出生佛法道。其心寬廣故。忍自善根。是出生佛法道。知業不失故。一切劫修行無厭足。是出生佛法道。盡未來際故。阿僧祇世界皆示現。是出生佛法道。成熟衆生故。不

斷菩薩行。是出生佛法道。增長大悲故。無量心。是出生佛法道。一念徧一切虛空界故。殊勝行。是出生佛法道。本所修行無失壞故。如來種。是出生佛法道。令一切衆生樂發菩提心。以一切善法資持故。是爲十。若諸菩薩安住此法。則得大丈夫名號。

〔疏〕第三出生佛法下三門。明對治修行增長。於中分二。先二門明修行增長。後一門明修行對治。今初亦二。此門正明增長。後門顯立勝名。今初從緣出生。卽增長義。亦猶出息增長其多。十中初二。順人信法。次二願智不虛。次二時處廣長。次二無間。

普徧後二勝行攝生

佛子。菩薩摩訶薩有十種大丈夫名號。何等爲十。所謂名爲菩提薩埵。菩提智所生故。名爲摩訶薩埵。安住大乘故。名爲第一薩埵。證第一法故。名爲勝薩埵。覺悟勝法故。名爲最勝薩埵。智慧最勝故。名爲上薩埵。起上精進故。名爲無上薩埵。開示無上法故。名爲力薩埵。廣知十力故。名爲無等薩埵。世間無比故。名爲不思議薩埵。一念成佛故。是爲十。若諸菩薩得此名號。則成就菩薩道。

疏二丈夫名號。卽立勝名。由德行內增。故嘉名外。

立十中。前四從境立名。五六約當體受名。上皆自
 利。七八利他。九通顯勝。具二利故。上皆自分因名。
 後一勝進果稱。上皆隨德假名。故瑜伽四十六。明
 菩薩隨德假名。有十六種。初名菩提薩埵。十六名
 為法師。顯揚第八莊嚴論十二。皆同此說。又商主
 天子經。五義立名。恐繁不會。論云。一切菩薩當知
復有如是等類。無有差別。隨德假名。所謂名為菩提
薩埵。摩訶薩埵。成就覺慧。最上照明。最勝真子。
最勝。任持。皆能降伏。最勝萌芽。亦名勇健。亦名最
勝。亦名商主。亦名大名。稱。亦名憐愍。亦名大福。亦
名自在。亦名法師。如是十方。無邊無際。諸世界中。
無邊菩薩。當知乃至內德。各別無量。無邊假立。相
號。釋曰。下引二論。與此全同。一二小異。義無以別。
又商主者。一於菩提分任持入故。故名菩提薩埵。

二入大乘故。滿大智故。故名摩訶薩埵。三不可求法。智德入故。故名最勝薩埵。四不與煩惱共住。爲諸衆生滅煩惱故。發精進故。故名淨薩埵。五令諸衆生行淨道故。故名極淨薩埵。

佛子。菩薩摩訶薩有十種道。何等爲十。所謂一道是菩薩道。不捨獨一菩提心故。二道是菩薩道。出生智慧及方便故。三道是菩薩道。行空無相無願不著三界故。四行是菩薩道。懺除罪障。隨喜福德。恭敬尊重。勸請如來。善巧迴向無休息故。五根是菩薩道。安住淨信。堅固不動。起大精進。所作究竟。一向正念。無異攀緣。巧知三昧。入出方便。善能分別。智慧境界故。六通是菩薩道。所謂天眼。悉見一切世界所有衆色。知

諸衆生死此生彼故。天耳悉聞諸佛說法。受持憶念。廣爲衆生隨根演暢故。他心智。能知他心。自在無礙。故宿命念。憶知過去一切劫數。增長善根故。神足通。隨所應化一切衆生。種種爲現。令樂法故。漏盡智。現證實際。起菩薩行。不斷絕故。七念是菩薩道。所謂念佛。於一毛孔見無量佛。開悟一切衆生心故。念法。不離一如來衆會。於一切如來衆會中親承妙法。隨諸衆生根性欲樂而爲演說。令悟入故。念僧。恒相續見。無有休息。於一切世間見菩薩故。念捨。了知一切菩薩捨行。增長廣大布施心故。念戒。不捨菩提心。以一

切善根迴向衆生故。念天常憶念兜率陀天宮一生
補處菩薩故。念衆生智慧方便教化調伏普及一切
無間斷故。隨順菩提八聖道是菩薩道。所謂行正見
道。遠離一切諸邪見故。起正思惟捨妄分別心。常隨
順一切智故。常行正語離語四過。順聖言故。恒修正
業教化衆生。令調伏故。安住正命。頭陀知足。威儀審
正。隨順菩提。行四聖種。一切過失皆永離故。起正精
進。勤修一切菩薩苦行。入佛十力無罣礙故。心常正
念。悉能憶持一切言音。除滅世間散動心故。心常正
定。善入菩薩不思議解脫門。於一三昧中。出生一切

諸三昧故。入九次第定。是菩薩道。所謂離欲。害。而
以一切語業說法無礙。滅除覺觀。而以一切智覺觀
教化衆生。捨離喜愛。而見一切佛心大歡喜。離世間
樂。而隨順出世菩薩道樂。從此不動。入無色定。而亦
不捨欲色受生。雖住滅一切想受定。而亦不息菩薩
行故。學佛十力。是菩薩道。所謂善知是處。非處。智善
知一切衆生去來現在業報因果。智善知一切衆生
上中下根不同。隨宜說法。智善知一切衆生種種無
量性智。善知一切衆生輒中上解差別。令入法方便
智。徧一切世間。一切刹。一切三世。一切劫。普現如來。

形相威儀而亦不捨菩薩所行智。善知一切諸禪解脫及諸三昧。若垢若淨。時與非時。方便出生諸菩薩解脫門智。知一切衆生於諸趣中死此生彼差別智。於一念中。悉知三世一切劫數智。善知一切衆生樂欲諸使惑習滅盡智。而不捨離諸菩薩行。是爲十。若諸菩薩安住此法。則得一切如來無上巧方便道。

〔疏〕第二有十種道。明修行對治。地經寄位。廣明三十七品。今約實位。故增數顯十。皆爲對治。並是正道。十中前二後一。名義皆不共。三道則名義俱共。四道至九。名共小乘義。唯實教前三可知。

言義唯

實者故

四行。云善巧迴向。無休息故。五根。定根。知
三昧入出。六通。天眼見。死此生彼。七。六念成。七。加
念。衆生爲大悲故。亦是廣七覺中一念覺故。餘例
此知。八。正思惟。順一切智。九。次第定。皆寂用。雙行。
初禪離欲。恚害而逆化衆生。亦用欲等言說。故云
一切語業。二禪雖無覺觀。不壞淨覺。以爲說因。三
禪離喜而生法喜。四禪離樂而受解脫道樂。從此
不動下。明四無色定。但總相顯勝。雖住滅下。卽滅
盡定。此定雖盡滅。諸不恒行心。心所法。及滅恒行
染汗一分。而以厭患想受爲先。故名滅想受定。由

非想地。猶有細想。是捨受故。今實教明。卽受等性
滅故。不息菩薩行。是以七地云能念念入。亦念念
起等。餘如三地及七地中辨。十力中六徧一切下。
是一切至處道智。八是天眼。九是宿命。今三世悉
知。况乎宿命。餘如初會中辨。已上五門明
四地中行竟

佛子。菩薩摩訶薩有無量道。無量助道。無量修道。無
量莊嚴道。

〔疏〕第五無量道下二門明。五地中行。分二。此門明
勝慢對治中行。後門明後二分中行。今初分二。先
總標四門。以此四門同顯道義。義皆無量。類例相

從故總標之約義須分。故後二屬後。鈔以此四門下出經總標

所以約義須分。下出疏別配所以。四中前二。是五地修道。為六地。莊嚴道。是七地。故云約義須分。後二屬後。恐是譯人一時標耳。

佛子。菩薩摩訶薩有十種無量道。何等為十。所謂虛空無量故。菩薩道亦無量。法界無邊故。菩薩道亦無量。衆生界無盡故。菩薩道亦無量。世界無際故。菩薩道亦無量。劫數不可盡故。菩薩道亦無量。一切衆生語言法無量故。菩薩道亦無量。如來身無量故。菩薩道亦無量。佛音聲無量故。菩薩道亦無量。如來力無量故。菩薩道亦無量。一切智智無量故。菩薩道亦無量。

量是爲十

〔疏〕二從佛子下。別明初門。謂十平等心。及隨如道行。皆是菩薩正道所游路。故以觸境皆如。道無不在。况虛空等十。一一無量。道豈有涯。十中前四。各一無量。後四皆佛界無量。語言亦屬衆生。亦是調伏界無量。劫數卽豎論無量。餘七橫論無量。虛空亦橫亦豎。法界非橫非豎。虛空法界。約無分量。餘八廣多無量。兼無分量。

佛子。菩薩摩訶薩有十種無量助道。所謂如虛空界無量。菩薩集助道亦無量。如法界無邊。菩薩集助道

亦無邊。如衆生界無盡。菩薩集助道亦無盡。如世界無際。菩薩集助道亦無際。如劫數說不可盡。菩薩集助道亦一切世間說不能盡。如衆生語言法無量。菩薩集助道出生智慧。知語言法亦無量。如如來身無量。菩薩集助道徧一切衆生。一切刹一切世一切劫。亦無量。如佛音聲無量。菩薩出一言音周徧法界。一切衆生無不聞知。故所集助道亦無量。如佛力無量。菩薩承如來力積集助道亦無量。如一切智智無量。菩薩積集助道亦如是無有量。是爲十。若諸菩薩安住此法。則得如來無量智慧。

疏二無量助道卽不住道。行勝及彼果勝中行。以智契如。是謂正道。萬行資緣皆爲助道。此二合行。名不住道。今以圓融之修。無不契如。並爲正道。皆互相資。並爲助道。故舉虛空等十。不異前章。然正道不隨事轉。同稱無量。助道隨事。故隨所等事。名無邊無盡等。已上二門明五地中行竟。

佛子。菩薩摩訶薩有十種無量修道。何等爲十。所謂不來不去。修身語意業無動作。故不增不減。修如本性。故非有非無。修無自性。故如幻。如夢。如影。如響。如鏡中像。如熱時燄。如水中月。修離一切執著。故空無。

相無願無作修明見三界而集福德不休息故。不可說無言說離言說修遠離施設安立法故。不壞法界修智慧現知一切法故。不壞真如實際修普入真如實際虛空際故。廣大智慧修諸有所作力無盡故。住如來十力四無所畏一切智智平等修現見一切法無疑惑故。是爲十。若諸菩薩安住此法。則得如來一切智無上善巧修。

〔疏〕第六無量修道一門。明六地中行。般若現前。爲眞修故。無去來等。卽十平等。故十中前四。卽勝慢對治中行。攝十平等。後六卽彼果勝中行。不住

道行勝十種觀緣。彼已廣故。此畧不明。四中前三約法。後一約喻。法中彼從別義。開成前八。今總明之。一不起心。二稱本性。三遣修相。亦可配三性三無性。如理思之。四舉七喻。通顯無著。亦可配三性者。如初來去。卽徧計所執性。以不不之。卽相無自性。性下二以依他圓成對生無自性。性勝義無自性。性可以意得。四舉七喻者。七喻全同彼文。論釋云。此明遣我非有相。而有二釋。一者前七句以無破有。七喻以有遣無。令不著無故。二者例同於前。亦以無遣有。故云我非有相。幻夢影像。不壞虛相。

取不可得。後六中。五雖證三空。集福德。六不著教法。不可說者。理圓言偏。言不能詮故。無言說者。性無言故。離言說者。忘言方會故。七不壞事法界。八不壞真如理。九總明權實之智。故力無盡。上皆自分修。十卽勝進修。已上一門明六地中行竟。

佛子。菩薩摩訶薩有十種莊嚴道。何等爲十。佛子。菩薩摩訶薩不離欲界。入色界無色界禪定解脫。及諸三昧。亦不因此而受彼生。是爲第一莊嚴道。智慧現前。入聲聞道。不以此道而取出離。是爲第二莊嚴道。智慧現前。入辟支佛道。而起大悲。無有休息。是爲第

三莊嚴道。雖有人天眷屬圍繞。百千姝女歌舞侍從。未曾暫捨禪定解脫。及諸三昧。是爲第四莊嚴道。與一切衆生受諸欲樂。共相娛樂。乃至未曾於一念間捨離菩薩平等三昧。是爲第五莊嚴道。

〔疏〕第七莊嚴道。下三門。明七地中行。分三。初門明權實雙行。次門明念念進趣。後門取授自在。今初卽彼地中。樂無作行。對治十種方便智。及雙行果。發起勝行中行。以權實交飾。故曰莊嚴。列中前五自行無染。

已到一切世間彼岸。於諸世法。悉無所著。而亦不捨。

度衆生行。是爲第六莊嚴道。安住正道。正智正見。而能示入一切邪道。不取爲實。不執爲淨。令彼衆生遠離邪法。是爲第七莊嚴道。常善護持如來淨戒。身語意業無諸過失。爲欲教化犯戒衆生。示行一切凡愚之行。雖已具足清淨福德。住菩薩趣。而示生於一切地獄畜生餓鬼及諸險難貧窮等處。令彼衆生皆得解脫。而實菩薩不生彼趣。是爲第八莊嚴道。不由他教。得無礙辯。智慧光明。普能照了一切佛法。爲一切如來神力所持。與一切諸佛同一法身。成就一切堅固大人明淨密法。安住一切平等諸乘諸佛境界。皆

現其前。具足一切世智光明。照見一切諸衆生界。能爲衆生作知法師。而示求正法。未曾休息。雖實與衆生作無上師。而示行尊敬。闍黎和尚。何以故。菩薩摩訶薩善巧方便。任菩薩道。隨其所應。皆爲示現。是爲第九莊嚴道。

〔疏〕次四隨有攝化。一無染而化。二處正入邪。三持犯權實。四人法權實。

善根具足。諸行究竟。一切如來所共灌頂。到一切法自在彼岸。無礙法。繒以冠其首。其身徧至一切世界。普現如來無礙之身。於法自在最上。究竟轉於無礙。

清淨法輪。一切菩薩自在之法皆已成就。而爲衆生
故於一切國土示現受生。與三世諸佛同一境界。而
不廢菩薩行。不捨菩薩法。不懈菩薩業。不離菩薩道。
不弛菩薩儀。不斷菩薩取。不息菩薩巧方便。不絕菩
薩所作事。不歇菩薩生成用。不止菩薩住持力。何以
故。菩薩欲疾證阿耨多羅三藐三菩提。觀一切智門。
修菩薩行。無休息故。是爲第十莊嚴道。若諸菩薩安
住此法。則得如來無上大莊嚴道。亦不捨菩薩道。

〔疏〕十總顯因果權實於中三。初因圓示缺。示現受
生是因未滿故。次與三世下。同果境界而不捨因。

因有十句。行通二利。法卽教法。業謂利他。道謂正智。儀謂制聽。取卽願求。巧謂權變。上皆所作事。總語因體。生成用者。卽因成大用。任持力者。長用不絕。後何以下。微釋可知。

佛子。菩薩摩訶薩有十種足。何等爲十。所謂持戒足。殊勝大願。悉成滿故。精進足。集一切菩提分法不退轉故。神通足。隨衆生欲。令歡喜故。神力足。不離一佛刹。往一切佛刹故。深心足。願求一切殊勝法故。堅誓足。一切所作咸究竟故。隨順足。不違一切尊者教故。樂法足。聞持一切佛所說法。不疲懈故。法雨足。爲衆

演說無怯弱故。修行足。一切諸惡悉遠離故。是爲十。若諸菩薩安住此法。則得如來無上最勝足。若一舉步。悉能徧至一切世界。

疏二十足。明念念進趣行。卽彼障對治中。修行無量種。及雙行分中。菩提分差別等。十中。初二約行。一戒。二進。次二約通。一總。二別。次二約心。一願。二誓。次二約法。一順。二持。後二約德。一演。二伏。

佛子。菩薩摩訶薩有十種手。何等爲十。所謂深信手。於佛所說一向忍可。究竟受持故。布施手。有來求者。隨其所欲。皆令充滿故。先意問訊手。舒展右掌。相迎。

引故。供養諸佛手。集衆福德無疲厭故。多聞善巧手。
悉斷一切衆生疑故。令超三界手。授與衆生拔出欲
泥故。置於彼岸手。四暴流中救溺衆生故。不憝正法
手。所有妙法悉以開示故。善用衆論手。以智慧藥滅
身心病故。恒持智寶手。開法光明破煩惱闇故。是爲
十。若諸菩薩安住此法。則得如來無上手。普覆十方
一切世界。

〔疏〕三十種手。明取授自在行。卽雙行分中。能作大
義。十中初一約取。謂念念中修習一切佛法。向佛
智故。餘九約授。於中前五明四攝。一布施。二愛語。

三四皆利行。五卽同事。共一手而作拔出故。後四卽四家。一苦清淨故。二示諸諦故。三般若力故。四捨煩惱故。已上三門明七地中行竟。

佛子。菩薩摩訶薩有十種腹。何等爲十。所謂離諂曲腹。心清淨故。離幻僞腹。性質直故。不虛假腹。無險誑故。無欺奪腹。於一切物無所貪故。斷煩惱腹。具智慧故。清淨心腹。離諸惡故。觀察飲食腹。念如實法故。觀察無作腹。覺悟緣起故。覺悟一切出離道腹。善成熟深心故。遠離一切邊見垢腹。令一切衆生得入佛腹故。是爲十。若諸菩薩安住此法。則得如來無上廣大。

腹。悉能容受一切衆生。

〔疏〕第八十腹。下三門。明第八地中行。以內證無生故。皆約內事。明內德圓滿。卽分爲三。初門明含容清淨德。卽彼集地分中無住道清淨等故。及淨忍分中得無生故。亦是得勝行分中離一切貪著等故。世人之腹。多含穢惡。今此十中。前六明惡無不離。七八九三。明善無不積。若能如是。凡卽佛腹佛子。菩薩摩訶薩。有十種藏。何等爲十。所謂不斷佛種。是菩薩藏。開示佛法無量威德故。增長法種。是菩薩藏。出生智慧廣大光明故。住持僧種。是菩薩藏。令

其得入不退法輪故。覺悟正定衆生是菩薩藏。善隨其時不踰一念故。究竟成熟不定衆生是菩薩藏。令因相續無有間斷故。爲邪定衆生發起大悲是菩薩藏。令未來因悉得成就故。滿佛十力不可壞。因是菩薩藏。具降伏魔軍無對善根故。最勝無畏大師子吼。是菩薩藏。令一切衆生皆歡喜故。得佛十八不共法。是菩薩藏。智慧普入一切處故。普了知一切衆生一切刹一切法一切佛。是菩薩藏。於一念中悉明見故。是爲十。若諸菩薩安住此法。則得如來無上善根。不可壞大智慧藏。

〔疏〕二有十藏。前總舉其腹。今別明五藏。由得勝行。諸佛勸起。一念出生。含攝成熟。無量德故。十中。初三出生三寶。次三成熟三聚。邪定亦有佛性。爲未來因。故起悲爲緣。涅槃云。一闡提人。雖復斷善。由佛性力。未來善根。還得生長。卽其義也。後四攝授佛果。最後卽一切智也。

佛子。菩薩摩訶薩有十種心。何等爲十。所謂精勤心。一切所作悉究竟故。不懈心。積集相好福徳。行故。大勇健心。摧破一切諸魔軍故。如理行心。除滅一切諸煩惱故。不退轉心。乃至菩提終不息故。性清淨心。知

心不動無所著故。知衆生心。隨其解欲。令出離故。令入佛法大梵住心。知諸衆生種種解欲。不以別乘而救護故。空無相無願無作心。見三界相不取著故。卍字相金剛堅固勝藏莊嚴心。一切衆生數等魔來。乃至不能動一毛故。是爲十。若諸菩薩安住此法。則得如來無上大智光明藏心。

〔疏〕三有十心。卽五藏之一。最爲勝故。五藏主故。卽此地能成諸善無功用心。前初地中明心。梵云質多。卽慮知心。對身口故。今此梵云纈唎陀耶。此云肉團心。對餘藏故。十中前六自利於中初二攝善。

一勤。二策。次二破惡。一破緣。二破因。次二成行。一堅。二淨。次二攝生心。一智令悟。二慈拯救。大梵住。卽四無量。後二成德。一深。二固。

已上三門明第八地中行竟

佛子。菩薩摩訶薩有十種被甲。何等爲十。所謂被大慈甲。救護一切衆生故。被大悲甲。堪忍一切諸苦故。被大願甲。一切所作究竟故。被迴向甲。建立一切佛莊嚴故。被福德甲。饒益一切諸衆生故。被波羅蜜甲。度脫一切諸含識故。被智慧甲。滅一切衆生煩惱闇故。被善巧方便甲。生普門善根故。被一切智心堅固不散亂甲。不樂餘乘故。被一心決定甲。於一切法離

疑惑故。是爲十。若諸菩薩安住此法。則被如來無上甲冑。悉能摧伏一切魔軍。

〔疏〕第九被甲下二門。明九地行。法師入有。備外嚴。故初門明入地十心。如被甲防內。將趣入故。十句

可知

佛子。菩薩摩訶薩有十種器仗。何等爲十。所謂布施是菩薩器仗。摧破一切慳悋故。持戒是菩薩器仗。棄捨一切毀犯故。平等是菩薩器仗。斷除一切分別故。智慧是菩薩器仗。消滅一切煩惱故。正命是菩薩器仗。遠離一切邪命故。善巧方便是菩薩器仗。於一切

處示現故。略說貪瞋癡等一切煩惱。是菩薩器仗。以煩惱門度衆生故。生死是菩薩器仗。不斷菩薩行教。化衆生故。說如實法。是菩薩器仗。能破一切執著故。一切智是菩薩器仗。不捨菩薩行門故。是爲十。若諸菩薩安住此法。則能除滅一切衆生長夜所集煩惱。

結使

〔疏〕二十器仗。器仗破外。以住地心。第十稠林。無不破故。十中。前五順仗破障。次三違仗破障。如令賊破賊故。次一非順非違仗。如以良謀。不用兵仗。無不破故。後一切成立德仗。

已上二門明第九地中行竟

佛子。菩薩摩訶薩有十種首。何等爲十。所謂涅槃首。無能見頂故。尊敬首。一切人天所敬禮故。廣大勝解首。三千界中最爲勝故。第一善根首。三界衆生成供養故。荷戴衆生首。成就頂上肉髻相故。不輕賤他首。於一切處常尊勝故。般若波羅蜜首。長養一切功德法故。方便智相應首。普現一切同類身故。教化一切衆生首。以一切衆生爲弟子故。守護諸佛法眼首。能令三寶種不斷絕故。是爲十。若諸菩薩安住此法。則得如來無上大智慧首。

疏第十種首下。十三門。明十地。行十地。德圓故。

寄六根四儀業用明之。且爲三初一總標德首。次六六根勝德。後六四儀成規。今初居受職位。首出衆聖故。十中初三果首。次三標之以因。釋之以果。後四直明行首。

佛子。菩薩摩訶薩有十種眼。所謂肉眼。見一切色故。天眼。見一切衆生心故。慧眼。見一切衆生諸根境界故。法眼。見一切法如實相故。佛眼。見如來十力故。智眼。知見諸法故。光明眼。見佛光明故。出生死眼。見涅槃故。無礙眼。所見無障故。一切智眼。見普門法界故。是爲十。若諸菩薩安住此法。則得如來無上大智慧。

眼

〔疏〕第二十眼。下六門。六根卽分爲六。初明十眼者。卽大盡分中。如實知見一切法故。十中前五名同諸教。而體用不同。諸宗肉眼見障內色。故智論三十七說。肉眼見近不見遠。見前不見後。等。天眼方見遠等。仍有分齊。今肉眼見一切色。已過二眼。然天眼是假和合。不見實相。今明見心。卽似同於彼。然心通性相。則亦不同。鈔言假和合者卽是出體。以肉天眼皆是清淨四大。不可見有對色爲體。但人天趣別耳。言不見實相者。卽是所見境界。但翻前見近不見遠等。則前五不見。天眼皆見。而不見實相。實相是慧眼境界。故今明見心下。顯此十眼。言似同彼者。心若約相。非實相。

故。今具性相。此中慧眼。似彼法眼。此中法眼。似彼
故。亦不同。所以互者。以彼慧眼。不能見衆生盡滅一異。
不能度生。今顯實過權。反此明能。彼中法眼。雖知
於法。不能徧知衆生方便道。今反此故。明知一切
意欲異權故耳。彼佛眼細無不知。今舉勝况劣。又
十力無不該。故後五中。智眼見事。卽法眼開出。光
明眼通身智光。義兼法慧。出生死眼者。然涅槃不
可見。絕見方見。見圓寂故。無礙眼者。總見諸眼境。
皆無障故。此卽一眼具多。爲不壞相故。須列十眼。
一切智眼。卽是普眼。非但見法界重重。亦乃法界

卽眼。故爲瞽門。故知十眼。全以無礙法界而爲其體。若辨次第。以肉眼見生受苦。次以天眼了知其心。次別知根境。次引入如實。次令得佛力。次尋光而見。次同歸寂滅。後等同法界。餘如別章。佛之三身化身具五報身無肉眼。法身無五眼。若約法性之眼亦得具五。然隨法相宗差別。斯法性宗中。一一圓融。

具如上說

佛子。菩薩摩訶薩有十種耳。何等爲十。所謂聞讚歎聲。斷除貪愛。聞毀訾聲。斷除瞋恚。聞說二乘。不著不求。聞菩薩道。歡喜踊躍。聞地獄等諸苦難處。起大悲心。發弘誓願。聞說人天勝妙之事。知彼皆是無常之

法聞有讚歎諸佛功德。勤加精進。令速圓滿。聞說六度四攝等法。發心修行。願到彼岸。聞十方世界一切音聲。悉知如響。入不可說甚深妙義。菩薩摩訶薩從初發心。乃至道場。常聞正法。未曾暫息。而恒不捨化衆生事。是爲十。若諸菩薩成就此法。則得如來無上大智慧耳。

〔疏〕二十耳者。然眼等六根。由得解脫神通無上。見聞觸等。皆自在故。總就行辨。此門亦卽釋名分中。聞持如來大法雨故。初二離順離違。次二棄小欣大。次二愍苦厭樂。次二滿果圓因。後二了俗同。

眞悲智俱運

佛子。菩薩摩訶薩有十種鼻。何等爲十。所謂聞諸臭物不以爲臭。聞諸香氣不以爲香。香臭俱聞其心平等。非香非臭安住於捨。若聞衆生衣服臥具及其支體所有香臭。則能知彼貪恚愚癡等分之行。若聞諸伏藏草木等香。皆如對目前分明辨了。若聞下至阿鼻地獄上至有頂衆生之香。皆知彼過去所行之行。若聞諸聲聞布施持戒多聞慧香。住一切智心不令散動。若聞一切菩薩行香。以平等慧入如來地。聞一切佛智境界香。亦不廢捨諸菩薩行。是爲十。若諸菩

薩成就此法。則得如來無量無邊清淨鼻。

疏三有十鼻。麤行香故於中初四聞香體俱舍有。四。總名爲香。一好香。謂沉檀等。二惡香。謂葱韭等。三等香。四不等香。謂於前一。增益依身。名爲等香。損減依身。名不等香。故亦不離好惡。今此中俱問。聞其上二。更無別體。非香非臭。對前成三。謂如柴炭等。次三聞香表用。瑜伽等中。上二界既無鼻舌。二識亦無香味。二塵。語其無麤聞。此有頂香者。明其聞細。菩薩力故。又有頂言。餘處多明是色究竟。準晉經中。聞非想香。則有頂言。亦是三有之頂。既

有通果之色。亦有通果之香。後三聞出世人法
佛子。菩薩摩訶薩。有十種舌。何等爲十。所謂開示演
說無盡衆生。行舌。開示演說無盡法門。舌。讚歎諸佛
無盡功德。舌。演暢詞辯無盡。舌。開闡大乘助道。舌。徧
覆十方虛空。舌。普照一切佛刹。舌。普使衆生悟解。舌。
悉令諸佛歡喜。舌。降伏一切諸魔。外道除滅。一切生
死煩惱。令至涅槃。舌。是爲十。若諸菩薩成就此法。則
得如來徧覆一切諸佛國土。無上舌。

〔疏〕四有十舌。演法味故。下三爲成六根。非顯三業。
三業前已有故。十中前五約辨顯德。後五約用十。

降四魔。魔卽天魔。生卽蘊魔。故。

佛子。菩薩摩訶薩。有十種身。何等爲十。所謂人身。爲教化一切諸人故。非人身。爲教化地獄畜生餓鬼故。天身。爲教化欲界色界無色界衆生故。學身。示現學地故。無學身。示現阿羅漢地故。獨覺身。教化令人辟支佛地故。菩薩身。令成就大乘故。如來身。智水灌頂故。意生身。善巧出生故。無漏法身。以無功用示現一切衆生身故。是爲十。若諸菩薩成就此法。則得如來無上之身。

〔疏〕五有十身。隨行成身故。

佛子。菩薩摩訶薩有十種意。何等爲十。所謂上首意。發起一切善根故。安住意。深信堅固不動故。深入意。隨順佛法而解故。內了意。知諸衆生心樂故。無亂意。一切煩惱不雜故。明淨意。客塵不能染著故。善觀衆生意。無有一念失時故。善擇所作意。未曾一處生過故。密護諸根意。調伏不令馳散故。善入三昧意。深入佛三昧。無我我所故。是爲十。若諸菩薩安住此法。則得一切佛無上意。

疏六有十意。初一總餘九別。文竝可知。

佛子。菩薩摩訶薩有十種行。何等爲十。所謂聞法行。

愛樂於法故。說法行。利益衆生故。離貪恚癡怖畏行。
調伏自心故。欲界行。教化欲界衆生故。色無色界三
昧行。令速轉還故。趣向法義行。速得智慧故。一切生
處行。自在教化衆生故。一切佛刹行。禮拜供養諸佛
故。涅槃行。不斷生死相續故。成滿一切佛法行。不捨
菩薩法行故。是爲十。若諸菩薩安住此法。則得如來
無來無去行。

〔疏〕第三六門。明四儀動止行。一行者。動游行法故。
於中令轉還者。轉有漏定。還無漏故。不斷生死者。
若斷。非真涅槃故。餘可知。

佛子。菩薩摩訶薩有十種住。何等爲十。所謂菩提心住。曾不忘失故。波羅蜜住。不厭助道故。說法住。增長智慧故。阿蘭若住。證大禪定故。隨順一切智頭陀知足。四聖種住。少欲少事故。深信住。荷負正法故。親近如來住。學佛威儀故。出生神通住。圓滿大智故。得忍住。滿足授記故。道場住。具足力無畏一切佛法故。是爲十。若諸菩薩安住此法。則得一切智無上住。

疏二十種住者。止息散動故。前七自分住。後三勝進住。

佛子。菩薩摩訶薩有十種坐。何等爲十。所謂轉輪王

坐興十善道故。四天王坐於一切世間自在安立佛法故。帝釋坐與一切衆生爲勝王故。梵天坐於自他心得自在故。師子坐能說法故。正法坐以總持辯才力而開示故。堅固坐誓願究竟故。大慈坐令惡衆生悉歡喜故。大悲坐忍一切苦不疲厭故。金剛坐降伏衆魔及外道故。是爲十。若諸菩薩安住此法。則得如來無上正覺坐。

〔疏〕三坐者。多時安處故。初四世坐以攝物。後六法坐以成德。

佛子。菩薩摩訶薩有十種臥。何等爲十。所謂寂靜臥。

身心憺怕故。禪定臥。如理修行故。三昧臥。身心柔輭故。梵天臥。不惱自他故。善業臥。於後不悔故。正信臥。不可傾動故。正道臥。善友開覺故。妙願臥。善巧迴向故。一切事畢臥。所作成辦故。捨諸功用臥。一切慣習故。是爲十。若諸菩薩安住此法。則得如來無上大法臥。悉能開悟一切衆生。

〔疏〕四十臥者。放捨身心。合法體故。十中。初三顯定。一。加行調身心。二。習修。三。得定。餘七定益。亦兼餘善。然其十事。各同臥之一義。初三後二可知。四。獨已臥故。五。離尸伏故。六。離依倚故。七。思明相故。互。

驚覺故。八右脇臥故。

佛子。菩薩摩訶薩有十種所住處。何等爲十。所謂以大慈爲所住處。於一切衆生心平等故。以大悲爲所住處。不輕未學故。以大喜爲所住處。離一切憂惱故。以大捨爲所住處。於有爲無爲平等故。以一切波羅蜜爲所住處。菩提心爲首故。以一切空爲所住處。善巧觀察故。以無相爲所住處。不出正位故。以無願爲所住處。觀察受生故。以念慧爲所住處。忍法成滿故。以一切法平等爲所住處。得授記剎故。是爲十。若諸菩薩安住此法。則得如來無上無礙所住處。

〔疏〕五住處者。知有棲止之所故。前明能住。此辨所住。十句可知。

佛子。菩薩摩訶薩有十種所行處。何等爲十。所謂以正念爲所行處。滿足念處故。以諸趣爲所行處。正覺法趣故。以智慧爲所行處。得佛歡喜故。以波羅蜜爲所行處。滿足一切智智故。以四攝爲所行處。教化衆生故。以生死爲所行處。積集善根故。以與一切衆生雜談戲爲所行處。隨應教化令永離故。以神通爲所行處。知一切衆生諸根境界故。以善巧方便爲所行處。般若波羅蜜相應故。以道場爲所行處。成一切智

而不斷菩薩行故。是爲十。若諸菩薩安住此法。則得如來無上大智慧所行處。

〔疏〕六所行處。前辨能行。此明所行。於中初四自行。一依四念。阿難四問。佛令依住。今辨依行。餘可思準。已上十三門明十地行竟。

○大文第六十觀察下五十一門。答上因圓果滿。若克實而論。成如來力下四門。方明果滿。前皆因圓。以八相前五猶屬因故。爲明八相皆示現故。通入果中。

佛子。菩薩摩訶薩有十種觀察。何等爲十。所謂知諸

業觀察。微細悉見故。知諸趣觀察。不取衆生故。知諸根觀察。了達無根故。知諸法觀察。不壞法界故。見佛法觀察。勤修佛眼故。得智慧觀察。如理說法故。無生忍觀察。決了佛法故。不退地觀察。滅一切煩惱。超出三界二乘地故。灌頂地觀察。於一切佛法自在不動故。善覺智三昧觀察。於一切十方施作佛事故。是爲十。若諸菩薩安住此法。則得如來無上大觀察智。

〔疏〕分二。初三十二門。明因圓究竟。卽等覺位。後十種住兜率下。一十九門。明現果圓滿行。卽妙覺位。前中分三。初一十四門。明因行體性。二十種義下。

八門。明方便造修。三十種魔。下十門。明因行除障。
初中二。初四門起行方便。二十種施下。十度行體。
前中三。初二門意業觀察。次一門身業自在。後一
門語業宣暢。前中初觀察者。解方便故。達通塞故。
於中初三觀所化。次四觀能化法。謂理果教行。後
三觀位。一超劣。二得位。三同果用。

佛子。菩薩摩訶薩。有十種普觀察。何等爲十。所謂普
觀一切諸來求者。以無違心。滿其意故。普觀一切犯
戒衆生。安置如來淨戒中故。普觀一切害心衆生。安
置如來忍力中故。普觀一切懈怠衆生。勸令精勤。不

捨荷負大乘擔故。普觀一切亂心衆生。令住如來一切智地。無散動故。普觀一切惡慧衆生。令除疑惑。破有見故。普觀一切平等善友。順其敎命住佛法故。普觀一切所聞之法。疾得證見最上義故。普觀一切無邊衆生。常不捨離大悲力故。普觀一切諸佛之法。速得成就一切智故。是爲十。若諸菩薩安住此法。則得如來無上大智慧。普觀察。

疏二。普觀察者。審慮周徧故。前六以六度治六蔽。衆生後四。雙明二利。謂順人證法。下化上成。

佛子。菩薩摩訶薩有十種奮迅。何等爲十。所謂牛王。

奮迅。映蔽一切天龍。夜叉乾闥婆等諸大衆故。象王
奮迅。心善調柔。荷負一切諸衆生故。龍王奮迅。與大
法密雲。耀解脫電光。震如實義雷。降諸根力覺分禪
定解脫三昧甘露雨故。大金翅鳥王奮迅。竭貪愛水。
破愚癡殼。搏撮煩惱諸惡毒龍。令出生死大苦海故。
大師子王奮迅。安住無畏平等大智。以爲器仗。摧伏
衆魔及外道故。勇健奮迅。能於生死大戰陣中摧滅
一切煩惱冤故。大智奮迅。知蘊界處及諸緣起。自在
開示一切法故。陀羅尼奮迅。以念慧力持法不忘。隨
衆生根爲宣說故。辯才奮迅。無礙迅疾。分別一切。咸

令受益。心歡喜故。如來奮迅。一切智智助道之法。皆悉成滿。以一念相應慧。所應得者。一切皆得。所應悟者。一切皆悟。坐師子座。降魔冤敵。成阿耨多羅三藐三菩提故。是爲十。若諸菩薩安住此法。則得諸佛於一切法無上自在奮迅。

〔疏〕二身業自在中。謂實德內充。威德外溢。如師子王奮迅威勢。更有異釋。如法界品辨。於中前五寄喻。次四約法。上皆自分。後一勝進。

佛子。菩薩摩訶薩有十種師子吼。何等爲十。所謂唱言。我當必定成正等覺。是菩提心大師子吼。我當令

一切衆生未度者度。未脫者脫。未安者安。未涅槃者
令得涅槃。是大悲大師子吼。我當令佛法僧種無有
斷絕。是報如來恩大師子吼。我當嚴淨一切佛刹。是
究竟堅誓大師子吼。我當除滅一切惡道及諸難處
是自持淨戒大師子吼。我當滿足一切諸佛身語及
意相好莊嚴。是求福無厭大師子吼。我當成滿一切
諸佛所有智慧。是求智無厭大師子吼。我當除滅一
切衆魔及諸魔業。是修正行斷諸煩惱大師子吼。我
當了知一切諸法無我。無衆生。無壽命。無補伽羅。空。
無相。無願。淨如虛空。是無生法忍大師子吼。最後生

菩薩震動一切諸佛國土。悉令嚴淨。是時一切釋梵四王咸來讚請。唯願菩薩以無生法而現受生。菩薩則以無礙慧眼。普觀世間一切衆生。無如我者。卽於王宮示現誕生。自行七步。大師子吼。我於世間最勝第一。我當永盡生死邊際。是如說而作大師子吼。是爲十。若諸菩薩安住此法。則得如來無上大師子吼。

〔疏〕三師子吼者。旣勇健無畏。則能決定宣唱。一中令物度苦脫集。安道證滅故。餘竝可知。

大方廣佛華嚴經疏論纂要卷第九十四

白雲寺比丘性遠太梁全刻
華嚴疏論纂要第九十四卷伏願植金
剛堅種立菩提正因仰報四恩普資九
有
康熙二十一年正月 日華藏室題